

Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: kontak@nuwelied.info
Webwerf: <http://www.nuwelied.info>

Yeshua is die Boom van die Lewe. Wanneer ons die Torah bestudeer moet ons onthou dat Yeshua Messias die Lewende Torah is – die Woord van YHVH wat vlees geword het. Hy is die weg na die waarheid wat lewe gee – die Lewende Manna wat uit die hemel gestuur is. Sonder Yeshua wat deur die Afgesonderde Gees in ons, en deur ons lewe, sal die geskrewe Torah net die dooie letter van die wet wees!!

Yeshua is die hart van die Vader!

Parashah 42: Mattot (מטות) – Stamme

Moshe het met die hoofde van die stamme van die kinders van Yisra'el gepraat en gesê: "Hierdie is dit wat יהוה beveel het". Num. 30:1 – PWL¹

Torah : Num. 30:1 tot 32:42

Haftorah: Jer. 1:1 tot 2:3

Nuwe Verbond: Matt. 5:33 tot 37; Hand. 5:1 tot 11; Gal. 5:19 tot 23; Kol. 3:5 tot 8.

Hierdie notas is aanvullend tot die vorige notas vir Parashah 42 wat afgelaai kan word by: [Parashah42notas14](#) of by [Parashah42Notas15](#).

What Do You Believe?

I asked this question: 'why is it so easy for people to believe in lies?' Why? Because lies appeal to the carnal and fleshy mind. Truth must be received in the spirit of a person for it to become reality to a person. If truth is continually seen as the enemy, it will never be embraced by people. Lies are easily believed because they creep in slowly, and before a person knows it, they are believing in something they would have otherwise immediately rejected if it had come right up to them and introduced itself saying, "My name is Lie."

Truth is rejected often times by people, because it does not conform to what they have always been taught. Truth DOES make itself known upfront saying, "My name is Truth!" It doesn't care if it is received or not because it cannot be anything other than what it is.

¹ Alle teksverwysings is geneem uit PWL Vertaling, behalwe waar anders vermeld. Die PWL Vertaling (Pad van Waarheid tot die Lewe) kan gratis afgelaai word by www.padwlewe.ch, maar is ook nou in gedrukte formaat beskikbaar. Om 'n kopie van die Bybel te bekom kan Gerrie Coetzee per e-pos by padwlewe@yahoo.com of telefonies by 074 361 2134 gekontak word.

Truth wears no mask or disguise. Truth parallels the light. Light cannot creep in slowly, as hiding under a cloak. Light is either on or off; opposed or accepted; ran from or received. This is the nature of truth. And as Messiah referenced, "do not hide it under a barrel, but place it on a table so that all who enter the house can enjoy its light." (The Well Trodden Road)

Die volledige artikel is beskikbaar by: <http://www.thewelltroddenroad.org/what-do-you-believe/>

If Christians were not such cowards, and absolutely disobedient to this plain command of God... one thing would certainly come of it – either they would be murdered in the streets as martyrs, because men could not bear the intolerable presence of truth, or they would be speedily converted to God – Charles Finney.

Midrash (Torah Bespreking)

YHVH Deleger Sy Gesag

Regdeur die Skrifte sien ons talle voorbeelde van YHVH wat Sy gesag aan mense deleger en hulle dan aanspreeklik hou vir die hantering en toepassing van daardie gesag. Gedelegerde gesag is om die volmag te ontvang om namens die persoon aan wie die gesag behoort, op te tree ten opsigte van, of in 'n bepaalde situasie. Gedelegerde gesag bring altyd verantwoordelikheid en aanspreeklikheid teenoor die een aan wie die gesag behoort.

YHVH se gedelegerde gesag moet altyd binne die raamwerk (grense) van Torah hanteer en toegepas word. Die een aan wie YHVH die gesag gee moet uiteraard self onderdanig wees aan YHVH se onderrig en instruksies soos dit in Yeshua volbring is.

Die eerste voorbeeld van YHVH se gedelegerde gesag vind ons in die tuin van Eden toe YHVH aan die mens die gesag gegee het om te heers oor Sy skepping:

God het gesê: "Laat Ons die mens maak na Ons beeld, net soos Ons en laat hulle heers oor die visse van die see, die voëls van die hemel, die vee en oor die hele aarde en oor al die diere wat op die aarde beweeg." Gen. 1:26.

Ons sien ook hierdie gedelegerde gesag in Gen. 2:15 toe YHVH aan die mens gesê het om die tuin te bewerk en te bewaak.

Toe het יהוה-God, die mens gevat en hom in die tuin van `Eden gesit om dit om te spit en te beskerm. Gen. 2:15.

YHVH het aan die mens die gesag gegee om namens Hom om te sien na Sy skepping deur dit eerstens *om te spit (te bewerk)*. Die Hebreeuse woord is *abad* en beteken om as dienskneg te arbeid. En, tweedens, om YHVH se skepping te bewaak (Hebreeus *sh'mar*), naamlik om dit te beskerm en behoue te laat bly.

Die Hebreeus vir *heers* is *radah* en beteken om YHVH se Skepping tot onderdanigheid (diensbaarheid) aan YHVH te bring. Die klem is egter op diensbaarheid. Dit moet gesien word in die lig daarvan dat alles wat YHVH geskape het 'n doel dien. Die mens moet dus op 'n wyse heers sodat die doel van alles wat YHVH geskape het tot nut van alles wat geskape is sal wees en sonder dat dit wat YHVH geskape het tot niet sal gaan. Opgesom: Aan die mens is die gesag gegee om die Skepping te bewerk en dit te bewaar!!

YHVH-God het hierdie gedelegeerde gesag nooit teruggetrek nie en daarom sal die mensdom tot die oordeelsdag aanspreeklik gehou word vir die wyse wat hierdie gesag gebruik is – of eerder misbruik is!

Die sondeval was die begin dat die mens op die *bewerk* die klem gelê het (en met tyd nie meer tot voordeel van almal nie, maar vir eie gewin) en dat die *bewaar* toenemend agterweë gebly het! Daarom is die wêreld vandag in die situasie waar natuurlike hulpbronne toenemend uitgeput word en sommige reeds feitlik totaal uitgeput is. Die mensdom is grootliks op 'n pad van selfvernietiging! Die rede? Die mensdom het die aarde bewerk, maar nie bewaar nie!

Dit is ook belangrik om te verstaan dat die mens nie aangestel is om oor ander mense te heers (*radah*) nie. Nee, want YHVH Yeshua is ewige koning en Hy alleen heers oor alle mense. Diegene wat YHVH wel oor ander aangestel het, moet heers deur dié te dien oor wie hulle aangestel is!! Yeshua is ons voorbeeld:

Yeshua het hulle geroep en vir hulle gesê: “Julle weet dat die heersers van die nasies baas speel oor hulle en die leiers outoriteit het oor hulle, maar só moet dit onder julle nie wees nie, maar elkeen wat onder julle groot wil word, moet julle dienaar wees en wie ook al tussen julle die eerste wil wees, moet julle slaaf wees; net soos die Seun van die mens nie gekom het om bedien te word nie, maar om te dien en Homself as 'n Losprys vir baie te gee.” Matt. 20:25 tot 28.

Dit bring ons dan by die naam van hierdie week se Torahskriflesing, naamlik *mattot*, en wat verwys na die hoofde van die twaalf stamme as die gesagsowerhede wat oor Israel aangestel is volgens YHVH se gesagstruktuur. Daarom is die betekenis van *mattot* ook 'n *staf*, verwysend na gesag (outoriteit), asook as 'n *tugroede* of *meetroede*. Moses het dus met die aangestelde gesagsowerhede van Israel gepraat en aan hulle die laaste onderrig gegee voor Israel die Beloofde Land in besit sou neem.

Authority does not make you a leader. It gives you the opportunity to be one..!

YHVH is die Oppergesag – die Wetgewer wat alle natuurwette en geestelike wette geskep het en wat dit alles in stand hou deur die Boodskap van Sy wonderwerkende krag (Heb. 1:3). YHVH delegeer Sy gesag aan diegene wat bereid is om onder Sy gesag te staan. Maar ons moet ook beseft dat YHVH sekere gesagstrukture geskep het waarin die mens 'outomaties' aangestel word.

Een so 'n voorbeeld is die feit dat YHVH sy gesag aan die man as die hoof van die huis gedelegeer het. Die man moet dus as die hoof van die huis namens YHVH heers op 'n wyse wat tot almal se voordeel sal strek. Dit is nie 'n geval van 'n keuse deur die man en vader nie! Nee, volgens YHVH se gesagstruktuur is die man die hoof van sy huis en sal hy daarvoor aanspreeklik gehou word.

Die man moet op dieselfde wyse oor sy huis heers as wat Yeshua oor die gemeente heers, naamlik deur sy vrou en kinders te dien en sy lewe vir hulle af te lê! Paulus verduidelik YHVH se gesagstruktuur in gesinsverband soos volg in Efes. 5:22 tot 31:

Vroue, wees aan julle eie mans gehoorsaam, net soos aan ons Meester, want die man is die hoof van die vrou, net soos Die Gesalfde Een ook Hoof is van die gemeente en Hy is die Redder van die liggaam,

maar soos die gemeente aan Die Gesalfde Een gehoorsaam is, op dieselfde manier moet die vroue ook, in alles, aan hul eie mans wees.

Mans julle moet julle eie vroue liefhê, net soos Die Gesalfde Een ook die gemeente liefgehad en Homself om haar ontwil oorgegee het,

om dit af te sonder en te reinig in die wassing met water (Mikveh) en in die Woord en Hy sal die gemeente vir Hom bevestig, wanneer dit vol lof en eer, sonder vlek of kreukel of enige iets soortgelyks is, maar dit moet afgesonderd en sonder fout wees.

Op dié manier moet mans hulle eie vroue liefhê soos hul eie liggame. Wie sy eie vrou liefhet, het homself lief,

want niemand het ooit sy eie liggaam gehaat nie, maar hy voed en sorg vir sy eie, net soos die Meester vir die gemeente,

want ons is ledemate van Sy liggaam, van Sy vlees en van Sy bene.

“Die man moet daarom sy vader en sy moeder verlaat en hom aan sy vrou verbind en hulle twee sal een liggaam wees.”

In die lig van bogenoemde kan ons Num. 30:1 tot 16 verstaan, naamlik die onderrig en instruksies oor geloftes en eedswering wat deur vroue gemaak word.

Eerstens leer Torah ons dat ‘n persoon (almal) wat ‘n gelofte doen of ‘n eed sweer wetlik en moreel verplig is om daarvolgens te handel.

Wanneer iemand aan יהוה 'n gelofte doen of 'n eed sweer waardeur hy homself tot iets verbind, moet hy sy woord nie breek nie; hy moet alles doen wat uit sy mond uitgaan. Num. 30:2.

Dit is egter belangrik om die verskil tussen ‘n gelofte en ‘n eedswering te verstaan, naamlik:

- ❖ ‘n Gelofte (Hebreeus: *nader*) is ‘n vrywillige belofte (gewoonlik aan YHVH) waarvolgens nougeset gehandel moet word, want dit is bindend en vergelykbaar met ‘n skuldbrief (‘n verpligting, ‘n verband, ‘n obligasie, ‘n pandbrief).
- ❖ ‘n Eedswering (Hebreeus: *shavah*) is ‘n gelofte (belofte) wat gemaak word in die teenwoordigheid van die hoogste gesag wat as getuie teenwoordig is. Dit is ‘n verklaring van die waarheid, naamlik van dit wat was, dit wat is en van dit wat sal wees. Die Hebreeus *shavah* is afgelei van *shevah* wat sewe beteken en dus na die volmaakte verwys. Eedswering is dus gelykstaande aan ‘n gelofte wat jy sewe keer maak!!

Geloftes en eedsweringe is dus woorde wat uit ons mond gaan en daarom moet ons alles doen wat ons sê. Deut. 23:21 tot 23 dien as bevestiging van Num. 30:2, naamlik:

Wanneer jy aan יהוה, jou God, 'n gelofte doen, moet jy nie uitstel om dit te betaal nie, want dit sal sonde in jou wees en יהוה, jou God, sal dit sekerlik van jou vereis; daarenteen, as jy nalaat om te belowe, sal dit geen sonde in jou wees nie. Jy moet versigtig wees om te doen wat oor jou lippe gaan, net soos jy aan יהוה, jou God, vrywillig oorgegee het, wat jy beloof het.

Tydens Yeshua se bergpredikasie het Hy ook na geloftes en eedsweringe verwys toe Hy gesê het:

Verder het julle gehoor dat aan die mense van die ou tyd gesê is: 'Jy moenie jou eed verbreek nie,' en, 'jy moet jou beloftes aan יהוה hou,' maar Ek sê vir julle: 'Lê hoegenaamd nie 'n eed af "by die hemel" nie omdat dit die troon van God is; ook nie "by die aarde" nie omdat dit Sy voetstoel is; ook nie "by Yerushalayim" nie omdat dit die stad van die groot Koning is en moet ook nie by jou kop 'n eed aflê nie omdat jy nie een haar wit of swart kan maak nie. Laat slegs julle 'Ja' 'n eenvoudige 'Ja' wees en julle 'Nee' eenvoudig 'Nee'. Enige iets meer as dit het sy oorsprong in die Bose een.' Matt. 5:33 tot 37.

Elke mens is gebind deur die woorde van sy mond! Dit is die wysheid van Salomo toe hy ook gesê het:

Die bose kan nie bevry word deur 'n oorvloed van woorde nie, maar hy wat sy lippe inhou, is wys. Die tong van die regverdige is soos uitgesoekte silwer; die verstand, wil en emosie van die bose is vol bitterheid. Die lippe van die regverdige is vol onverdiende guns, maar die dwase sterf deur die gebrek aan wysheid. Spr. 10:19 tot 21.

'n Man se maag sal versadig word deur die vrug van sy mond en deur die vrug van sy lippe sal hy vol gemaak word. Dood en lewe is in die mag van die tong en hulle wat dit liefhet, sal die vrug daarvan eet. Spr. 18:20 en 21.

Elke mens sal die gevolge dra van sy woorde, want dood en lewe is in die mag van die tong. Aansluitend hierby het Yeshua ook gesê:

want Ek sê vir julle dat van elke waardelose woord wat mense praat, sal hulle 'n antwoord moet gee in die oordeelsdag, want deur jou woorde sal jy onskuldig beskou word en deur jou woorde sal jy skuldig bevind word." Matt. 12:36 en 37.

Die hoof van die huis

YHVH ons Vader en God is die hoof van Sy huis en huishouding. Wanneer ons gehoorsame kinders van YHVH is, sal ons ook soos Dawid kan sê:

U goedheid en onverdiende guns sal my sekerlik volg al die dae van my lewe en ek sal vir ewig in die huis van יהוה bly. Ps.23:6.

In die verhouding wat deur die huwelik tot stand kom, het beide man en vrou 'n spesifieke rol om te speel en 'n bydrae om te lewer volgens YHVH se plan. Die fondament waarop hierdie rolverdeling gebou word, is egter die feit dat YHVH die man as die hoof van die vrou aangestel het en dat die vrou derhalwe aan haar man onderdanig moet wees.

Dit is YHVH se gesagsorde en YHVH se gedelegeerde gesag aan die man is nie op verdienste gegrond nie! Alvorens 'n man in die huwelik tree moet hy derhalwe seker wees dat hy verstaan wat hierdie verantwoordelikheid behels en dat hy bereid is om dit te aanvaar. Soos reeds verduidelik hou YHVH die man aanspreeklik ongeag of die man YHVH as God en Yeshua as Messias erken of nie.

Deel van YHVH se gedelegeerde gesag wat aan die man as hoof van sy huis gegee is, is die vetoreg (kanselleringsreg) oor 'n gelofte of eedswering of dit wat onverskillig uitgespreek is deur sy vrou of dogter.

Volgens Num. 30:3 tot 5 het die vader die gesag om sy ongetroude dogter se gelofte en eedswering tot niet te verklaar, maar hy moet dit doen op die dag wat hy daarvan hoor.

Wanneer 'n vrou aan יהוה 'n gelofte gedoen het of haarself tot iets verbind het terwyl sy jonk was in haar vader se huis en haar vader van haar gelofte hoor of van die verbintenis waartoe sy haarself verbind het en haar vader oor haar stilgebly het, dan sal al haar geloftes staan en elke verbintenis waartoe sy haarself verbind het, sal staan, maar as haar vader haar verbied op die dag dat hy daarvan hoor, sal geen van haar geloftes en verbintenisse waartoe sy haarself verbind het, staan nie en יהוה sal haar vergewe omdat haar vader haar verbied het.

Num. 30:3 tot 5.

Indien hy dit nie doen nie, sal die dogter se geloftes en eedsweringe van krag bly en sal sy dus aanspreeklik gehou word.

Volgens Num. 30:6 tot 14 geld dieselfde ten opsigte van die getroude vrou:

As haar man die dinge uitdruklik verbreek op die dag dat hy daarvan hoor, sal niks van alles wat oor haar lippe uitgegaan het, van haar geloftes of van dit waartoe sy haarself verbind het, staan nie; haar man het dit verbreek en יהוה sal haar dit vergewe. Elke gelofte, elke eed en elke verbintenis om haarself te verneder; haar man sal dit laat vasstaan, of haar man kan dit vernietig. Num. 30:12 en 13

Sou die vader egter op 'n later stadium van mening verander en sy kanselleringsreg dan gebruik, is dit te laat en sal hy aanspreeklik gehou word vir sy vrou en dogter se skuld van geloftes en eedswerings wat nie nagekom is nie!

As haar man van dag tot dag heeltemal stilbly teenoor haar, dan het hy al haar geloftes en alles waartoe sy haarself verbind het, bevestig; hy het dit bevestig, want hy het stilgebly teenoor haar op die dag dat hy daarvan gehoor het. As hy dit duidelik tot niet maak nadat hy daarvan gehoor het, dan dra hy haar skuld. ”” Num. 30:15.

Hierdie gedelegerde gesag het YHVH aan die eggenoot en vader gegee om sy vrou en dogter te beskerm teen onverskillige geloftes en eedsweringe!

Ons moet verstaan dat YHVH sal altyd Sy gedelegerde gesag eerbiedig. YHVH se gedelegerde gesag kan nie omseil word nie. Daarom moet die vrou aan haar man en die dogter aan haar vader onderdanig wees, want hy is YHVH se aangestelde gesag.

Hierdie is ook bevestiging van die orde wat Vader-God in 'n huishouding vereis. Die man (vader) is aangestel as hoof van die huishouding en moet te alle tye volgens Torah-beginsels sy huishouding namens Vader-God versorg, naamlik onderrig, voorsien en beskerm. Hy is dienskneg van YHVH wat die gesag ontvang het om te heers oor sy huis deur hulle te dien!

Paulus het gedelegerde gesag verstaan en daarom het hy in sy brief aan die Romeine geskryf:

Elke gees moet aan die hoër outoriteite gehoorsaam wees, want daar is geen outoriteit as dit nie vanaf God is nie en daardie selfde outoriteit, wat van God is, is onder bevel. Wie ook al teenoor die outoriteite staan, staan daarom teenoor die opdragte van God en die wat dit teëstaan, sal hulle oordeel ontvang, want die regters hou geen vrees in vir hulle wat goed doen nie, maar vir die bose. As jy nie bang wil wees vir die outoriteit nie, doen wat goed is en jy sal lof van hom af ontvang, want hy is die uitvoerder van God vir jou ten goede, maar as jy doen wat boos is, wees dan bang, want hy dra nie verniet die swaard nie, want hy is 'n uitvoerder van God, 'n vergelder van die woede, om die een wat boosheid doen, te straf.

As gevolg hiervan is dit noodsaaklik vir ons om gehoorsaam te wees, nie alleen ter wille van die wraak nie, maar ter wille van die gewete, want daarom betaal julle ook belasting, want hulle is uitvoerders van God wat vir hierdie dinge aangestel is.

Beloon daarom elke persoon soos wat aan hom verskuldig is: belasting aan die waaraan belasting verskuldig is, invoerbelasting aan die waaraan invoerbelasting verskuldig is; respek aan dié wat respek toekom, eer aan dié wat eer toekom. Rom. 13:1 tot 7.

YHVH se onderrig oor geloftes en eedswering gee vir ons ook insae in die hoedanighede van Vader-God. Indien YHVH ons opdrag gee om te handel volgens ons geloftes en eedswerings, dan beteken dit dat Hy ook getrou sal wees aan al Sy Woorde. Dit wat YHVH gespreek het staan vir ewig vas en hy is wakker oor Sy Woord om dit te volbring (Jer. 1:12). YHVH is nie 'n mens dat Hy sal lieg nie (Num. 23:19) – dit wat Hy spreek sal Hy waar maak!! By die Vader van Lig is daar geen verandering of skaduwee van omkering nie (Jak. 1:17).

'n Gelofte en 'n eedswering is vir ewig van krag. Daarom sê dit in Num. 30:2 dat ons nie ons woord mag breek nie, maar moet handel volgens die woorde wat uit ons mond uitgaan. Die geloftes en eedswering van ons ouers en grootouers is dus ook ewig van krag en ons as nageslag word gebind deur enige geloftes en eedsweringe van ons voorouers wat nie nagekom was nie.

Voorbeeld uit die Skrifte

In Rigters 11:30 tot 40 lees ons van die gelofte wat Jefta (Yiftag) gemaak het voordat hy in 'n oorlog met die Ammoniete betrokke geraak het:

Yiftag het 'n gelofte aan יהוה gedoen en gesê: “As U waarlik die seuns van `Ammon in my hand gee, dan sal dit wees dat wat ook al uitkom uit die deure van my huis om my te ontmoet, as ek in vrede terugkom van die kinders van `Ammon, aan יהוה sal behoort en ek sal dit as 'n brandoffer offer.” Rigters 11:30 en 31.

YHVH het die Ammoniete in die hand van Jefta gegee en hy het hulle verslaan. Maar dan lees ons:

Toe Yiftag in Mitzpah by sy huis kom, let op, het sy dogter uitgekom om hom te ontmoet met tamboeryn en dans. Sy was sy absoluut enigste kind; behalwe vir haar het hy geen seun of dogter gehad nie. Toe hy haar sien, skeur hy sy klere en sê: “Ag, my dogter! Jy laat my baie laag neerbuig en jy is tussen hulle wat vir my moeilikheid bring, want ek het my woord aan יהוה gegee en ek kan dit nie terugtrek nie.” Rigters 11:34 en 35.

Dat 'n gelofte en eedswering bindend is, is duidelik volgens die woorde van Jefta aan sy dogter: *Jy laat my baie laag neerbuig en jy is tussen hulle wat vir my moeilikheid bring, **want ek het my woord aan יהוה gegee en ek kan dit nie terugtrek nie.*** Maar dit is ook duidelik volgens die woorde van sy dogter aan hom toe sy gesê het:

“My vader, u het u woord aan יהוה gegee; doen aan my soos u gesê het, aangesien יהוה u gewreek het op u vyande, die seuns van `Ammon.” Rigters 11:36

Wedergeboorte

Wedergeboorte is ook 'n gelofte en eedswering wat ons elkeen gemaak het.

As jy met jou mond ons Meester, Yeshua, verklaar en met jou verstand, wil en emosie vertrou dat God Hom uit die dood uit opgewek het, sal jy lewe hê, want die verstand, wil en emosie wat in Hom vertrou, is onskuldig verklaar en die mond wat Hom bely, lewe. Rom. 10:9 en 10

Die dag toe ons met ons mond bely het, en met ons hart geglo het dat Yeshua die Messias is wat gekruisig was en uit die dood opgestaan het, het ons vrywillig 'n belofte gemaak om in alles aan YHVH gehoorsaam te wees soos in Yeshua volbring is. Ons elkeen het dit gedoen in die teenwoordigheid van die hoogste gesag wat as getuie teenwoordig was.

Met wedergeboorte ontvang ons die gesag wat Yeshua aan Sy studentevolginge (dissipels) gegee het toe Hy aan hulle gesê het:

“Alle outoriteit in die hemel en op aarde is aan My gegee en soos die Vader My gestuur het, so stuur Ek julle. Gaan daarvolgens, maak studentevolginge van al die nasies, doop hulle in die Outoriteit en Karakter van die Vader en die Seun en die Gees van Afsondering en onderrig hulle sodat hulle alles sal gehoorsaam wat Ek julle beveel het en let op, Ek is saam met julle al die dae tot aan die einde van die heelal. Dit is waar.” Matt. 28:18 tot 20.

Met wedergeboorte word ons aangestel as dissipels en met hierdie aanstelling ontvang ons ook die opdrag en die gesag wat Yeshua aan elkeen van Sy dissipels gee. Dit is deel van die gelofte en eedswering wat ons elkeen afgelê het, naamlik dat ons voortaan sal lewe soos Yeshua gelewe het:

Hieraan weet ons dat ons Hom ken, as ons Sy opdragte uitvoer. Hy wat sê: ‘Ek ken Hom’ en Sy opdragte nie uitvoer nie, is 'n leuenaar en die waarheid is nie in hom nie, maar wie ook al Sy woorde voortdurend uitvoer, in hom het die liefde van God waarlik volmaak geword, want hieraan weet ons dat ons in Hom is: hy wat sê dat hy voortdurend in Hom bly, vir hom is dit nodig om so te leef soos wat Hy geleef het. 1 Joh. 2:3 tot 6.

Bepeins of Bespreek

1. Het Jefta sy dogter as brandoffer aan YHVH geoffer? Is 'n menslike brandoffer (*olah* – Lev. 1:1 tot 17) vir YHVH aanvaarbaar of is dit 'n gruwel (Lev. 18:21)? Is die antwoord volgens Rigters 11:37 tot 40 dat sy nooit getrou het nie en dat Jefta se nageslag by sy dogter geëindig het? Is dit die offer wat Jefta gebring het?
2. Elkeen is verantwoordelik om oor sy eie lewe en omstandighede te heers! Is dit moontlik? Hoe kan ons dit doen? Is deel van die antwoord in Joh. 14:23 en Jak. 4:7. Heers ons deur ons woorde? In sy artikel “Dood en Lewe” skryf Johann Möller die volgende:

ELKE WOORD wat gesprek word deur die Almagtige of deur 'n mens wat na Sy beeld geskape is, is 'n saad. Die oomblik wat 'n woord gesprek word is dit 'n saad wat gesaai word. Sodra 'n woord gesaai (gespreek) word dan sterf dit - dis klaar uit die mond en in die land (grond) van die wereld geplant. Dit sterf dan en sal veel vrug dra. Dit is ook die rede waarom 'n woord wat reeds gesprek is nie teruggetrek kan word nie. Dit is onmoontlik om koring wat alreeds in 'n land gesaai is weer bymekaar te maak. Elke gesaaide woordsaad sal uiteindelik vrugte voortbring. Hierdie vrugte sal of goeie of slegte vrugte wees afhangende of dit goeie of slegte woorde was wat uit die mond gekom het.

Het ons nie almal genesing van die tong nodig nie, want hoe dikwels is ons woorde saad wat die vrugte van dood voortbring? Ons kies lewe of dood deur die woorde van ons mond! Lees Jak. 3:1 tot 12 – beheersing van die tong.

3. Wat van die weduwee wat geloftes en eedsweringe maak (Num. 30:9). Sy staan onder geen gesag van 'n man nie. Is YHVH haar 'man' en 'vader' en moet sy op die Afgesonderde Gees vertrou om haar te herinner aan onverskillige geloftes en eedsweringe sodat sy direk by die Vader om vergifnis kan vra?
4. Wat van die geloftes en eedswering van ons ouers en grootouers wat nie nagekom was nie? Kan dit bindinge op ons eie lewe wees? Moet ons by die Vader om vergifnis vra hulle dade? Moet ons op die Afgesonderde Gees vertrou om ons te herinner aan onverskillige geloftes en eedsweringe van ons voorgeslagte?

-o-o-o-o-o-o-o-o-

Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shabbat Shalom.
Johan.

Epos: kontak@nuwelielied.info

Webwerf: <http://www.nuwelielied.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.